



A Husum è vegnì preschentà il film dals Fris en la Germania dal nord. MAD

# Da las Alps a la mar

RTR al festival da films da minoritads a Husum en la Germania

■ (cp) A Husum, la chapitala da la Frislanda dal nord, ha gì lieu dals 22 fin als 24 da november 2012 il quart Festival da film europeic da minoritads. Da la partida è stada era RTR Radiotelevision Svizra Rumantscha che ha preschentà sia seria da films documentars davart minoritads en l'Europa. En il center dal festival èn stads films dramatics da diversas minoritads europeicas. La giuria ha seleziunà quatter films da la Frislanda dal vest (Merke Blues), dals Bascs da la Spagna (Urteberri on, amona!), da la Tschechia (Cigan) e dal Danemarc (Kunsten at graede i kor). Gudagnà ha il film danais cun in drama da famiglia che ha mussà l'istorgia d'in bab deprimà ord vista da ses figl Allan. Il film ha persvadì pervi da sia autenticità e la realisaziun filmica consequenta ord la perspectiva da l'uffant.

Il Festival da film europeic da minoritads «Gronds films da pievels pitschens» ha gì lieu gia la quarta giada a Husum ed è vegnì organisà da Friisk Foriining. La sonda, ils 24 da november 2012 ha RTR envidà a la premiera da film sut l'ensaina da las Alps a la mar en il casti «Schloss vor Husum». En preschientscha da la ministra da cultura ed Europa, Anke Spoorendonk, e dal president da l'Uniuin federalistica da cuminanzas europeicas (UFC/FUEV), Hans Heinrich Hansen, è vegnì preschentà da RTR ina seria da films documentars davart minoritads en l'Europa. Gronda atenziun ha survegnì in dals emprims films da la seria ch'era deditgà als Fris da la Germania dal nord. A Husum è quest vegnì mussà exclusivamain cun in commentari fris e suttitels tudestgs.

RTR ha realisà questa seria cun 13 films per l'emissiun «Cuntrasts» e preschentà quests per l'emprima giada ad in public europeic. Tenor Mariano Tschuor, il directur da RTR, èn questas entupadas in segn impurtant per promover la solidaritad tranter las cuminanzas pitschnas e per rinforzar la conscienza da l'atgna valur envers las maioritads. Anke Spoorendonk, ministra e commembra da la minoritad danaisa en Schleswig-Holstein, vesa en quests films in agid per in'analisa autocritica e per dar in sguard sur l'agen orizont.

La seria cun quests 13 films documentars davart minoritads en l'Europa è cumparida sco box da dvd.  
Ulteriuras infurmaziuns:  
[www.rtr.ch/minoritads](http://www.rtr.ch/minoritads)